



Sulegl silla claustra

Dapi il zercladur ein 608 panels solars sils tetgs dalla claustra da Glion



Energia solara giu dil tetg dalla claustra da Glion.

FOTO PHILIPP BAER

DAD AUGUSTIN BEELI/FMR

■ **Ei seigi stau in bi project, denton nuota sempels da realisar, ha Vitus Walder manegiau margis duront la presentaziun dil project finiu. Gl'indigen da Schluein ha planisau e montau a Glion in grond project sils tetgs dalla claustra dallas soras dominicanas.** Gl'avrel ha la firma Solpic, specialisada sin installaziuns cun energia dil sulegl, entschiet la lavur. Ei seigi buca stau sempel, gest pervia dalla crisa da Corona, ha il meinagestium *Vitus Walder* manegiau. Solarspar, ina interpretesa da Sissach, cantun Basilea Tiara, sespecialisada per implonts da fotovoltaica, ha surdau ad el la lavur. Gl'indigen da Schluein ha saviu planisar e montar in implont sils tetgs dalla claustra dallas soras dominicanas da Glion. Sin tetgs da stallas modernas, sin fabricas novas e veglias, sin hallas e magazins, ei quei strusch pli problematic. Denton sin ina claustra – gliez ei stau ina sfida. La Tgira da monuments dil Grischun ha mess cundiziuns demai che la claustra s'auda dapi 1970 tiel maletg da Glion ed ei classada sco monument dall'architettura contemporanea. Alla fin dils onns sissonta ha gl'architect turitges *Walter Moser* concepiu il vast complex cun

casa materna per las soras pensiunadas, la baselgia claustrala ed ils novs baghetgs digl institut s. Giusep. Tut cun tetgs plats e conform al temps. La congregaziun ha bardigliau naven dil marcau silla spunda sulegliva da Quinclas.

Ella fasa dalla damonda da baghagiar ei la Tgira da monument dil Grischun la finala buca s'opponida encunter l'idea d'installar sils tetgs plats dalla claustra in implont solar. Ina dallas cundiziuns ei stada ch'ils panels astgien buca esser vesivels. Per la patruna da baghegiar ha quei muntau da stuer limitar la «rimnada» d'energia solara. Sco quei ch'il meinagestium da Solarspar, *Markus Chrétien*, ha explicau, ha sia firma liunga experientscha ella bransch solara. In implont da 555 m² ha ella installau il 2008 a Trun sil tetg dil magazin dall'anteriura fabrica da ponn. In autra referenza ei gl'implont solar a Val S. Pieder. Sil tetg dalla halla d'imbuttigliar dall'aua da Val ei ina surfatscha da 627 m² curclada cun panels solars. Ed in tierz implont pli grond ei quel silla stalla dil bein claustral Salaplauna a Mustér. Leu producescha in implont dapi endisch onns cun panels sin ina surfatscha da 1054 m².

Il quart implont che Solarspar baghe-

gia en Surselva, quel dalla claustra da Glion, ei cerca tuttina gronds sco quel a Mustér. Miez zercladur 2020 ha la producziun fotovoltaica entschiet. Solarspar ha fixau culla claustra in contract da servitut da 25 onns. Tochen la fin dil 2045 ha la claustra in prezi fix per sia electricidad, gl'implont ha ina prestaziun da 197,6 peaks kW e recav annual da 207'000 uras Kw.

Sco la priura generala, sora *Annemarie Müller*, ha declarau alla conferenza da medias, sededichescha la congregaziun da Glion gia adina al motto «conservar la Scaffaziun». La lavur realisada da Vitus Walder e finanziada dall'interpreta Solarspar riguarda l'energia regenerabla ed ei stada pusseviva grazia all'avartadad dalla claustra. L'idea sebasì sin in auter project el medem senn. Avon quater onns ha la claustra inaugurau ina pintga centrala electrica ella Val da Sontga Clau. Tuttina sco aua da beiber che sa esser nizeivla per producir forza electrica, seperschan era ils radis dil sulegl. Il cussegl general culla cuminonza dallas soras ei staus prompts da cuntinuar la via innovativa. Vitus Walder ha montau panels solars sin ina surfatscha da 1037 m². Ei havess aunc giu plaz per



dapli. Il tetg dalla baselgia claustrala fuss
nuotameins sepurschius. En entelgient-
scha cugl architect Walter Moser ein las
soras da Glion sedecididas da buca in-
volver gliez tetg, malgrad che quei ha-
vess disturbau nuotzun il maletg.